

TE KARAKIA I TAE AI TE TUIKA.

No te po o te Ratapu Pepuere 27 ka tae te Tiuka me tona hoa wahine ki te karakia i roto i te Whare-karakia o nga Maori i Ohinemutu. I reira hoki etahi o te ope a te Tiuka, me to tatou Pirimia me tona hoa, me Sir H. Rhodes me Te Hon. Wiremu, me te Hon. Bollard me etahi atu.

Ko te whakauru ki te karakia ma te tikiti anake, a he mea kowhiri kia 10 ki te 20 o ia iwi i tae mai nei ki te hui. E 50 nga morehu o te pakanga nui, tekau-ma-tahi nga morehu o nga pakanga Maori o te 1860 ki te 1870 i noho mai i muri i a ratou tamariki. Ko Roger Dansey te kai-whakahaere o nga hoia katoa.

Ko te wahi tuatahi o te karakia he tapaetanga na nga hoia i nga putiputi ki te Ata, hei whakamahara ki o ratou hoa e takoto mai ra i nga marae o te pakanga. I tukuna atu nga putiputi nei ki nga ringaringa o Rev. Peni Hakiwai, tetahi o o ratou matua i te wa o te mura o te ahi.

I roto i nga kupu mihi a Hakiwai, ka ki ia:—E tika ana kia hoki o tatou whakaaro i tenei ra ki o tatou hoa i mahue atu nei i a tatou e tiraha mai ra i tera marae i tera marae. Ahakoa kua mate, kei te ora tonu mai ratou. Ko nga putiputi nei he roimata no tatou mo ratou ma e takoto mai ra i nga marae o nga iwi ke.

I muri iho ka waiatahia te himene a nga hoia "Au e Ihu tirohia."

Ko te wahi tuatahi o te karakia na Paora Temuera i whakahaere ko te upoko na Panapa Minitia o Ngapuhi i panui ki te reo Maori, pakeha. Ko te wahi tuarua o te karakia na Te Hara-wira o te Pihopatanga o Akarana i whakahaere. Pai ana te marauna o nga reo rua o nga Minita. E 24 nga mema o te koaea, pai atu a ratou himene, me ta ratou "Anthem: Jesus shall reign." Ko te kauwhau i a Rev. P. Peneti. Ko tana rarangi he mea tango mai i a I Hana, 10:24. "**Na ka hamama te iwi katoa, ka mea, Kia ora te Kingi.**"

I whakaatu te kai-kauwhau i te whakamaramatanga o tenei rarangi me te hangaitanga ki tenei ra. He nui nga tohu o te piri-pono kei tena hapu kei tena hapu, i te mea he iwi piri-pono tonu te Maori. Ko nga raruraru kaore i tipu ake i waenganui i nga Maori me te Kuini, engari ki nga kai-whakahaere o tena mana.

Titiro ki nga tohu o te piri-pono o te marae e noho nei tatou.

(1) Ko te Kuini e tu mai ra i te Papa-i-Oaro. (2) ko nga haki e ono e tae nei i roto i te whare-karakia. (3) Ko te haki a te Kingi e tae nei i runga i te kai-kauwhau. (4) Ko nga morehu 11 o te pakanga Maori. (5) ko nga morehu o te pakanga nui kua taha ake nei. (6) Ko te pare putiputi e takoto mai ra i runga i te Ata, whakamahara ki nga tamariki rangatira o te iwi Maori e tira ha mai ra i roto i nga iwi ke o te ao.